

# Vun driveriver

---

erscheint auf [www.lenauheim.de](http://www.lenauheim.de)

monatliche  
Erscheinung

November 2024

von Helen Alba

## Heimatkerch in Kleenformat gebastelt

Zum 250. Weihetach – Erinnerunge an friehrichi Zeite

„Im Juni 2019 war ich mit meiner Frau Adelheid anlässlich der Jubiläumsfeier `250 Jahr seit der Ansiedlung` in meim Heimatort Bogarosch“, erzählt Johann Erhardt aus Haibach bei Aschaffenburg. „Bei dem Besuch sin mer als Erschtes natierlich in unser Kerch gang. Meiner Seel, es war e Schock for mich zu gsiehn, wie baufällig un reparaturbedirftich die Kerch in der Dorfmitt steht. Un ich han mer vorghol, die Kerch so in Kleenformat zu bastle, wie ich se in beschter Erinnerung han“.

Sorgfältich bis zur letschi Kleenichkeit

Die Bastelarweit hat vier Monat gedauert. De Hans hat noh originale Bauplän die Maße ausgerechnet: 36 cm Länge, 33 cm Breite un 82 cm Höhe. Dernoh Material bsorcht un sich an die Arweit gemacht. Als Vorlage hat er Bilder benutzt un aus der Erinnerung unser Bogaroscher Kerch gebastelt, wie uf de Bilder in der heitichi Pipatsch zu gsiehn is. „Wie ich vorgang sin: Ich han de originale Bauplan, also de Grundris der Kerch ghat. So han ich Bauplatten kauft un gerechnet, wie groß mei Projekt sin soll. Alles han ich zugschnied un mit eem Spezialkleber gepickt, druf owacht gin, dass Finschtre un Tiere ausgschnied un gstrich sin gin. Tiere un Finschtre sin alli separat angefertigt un dernoh ingebaut wore. So staat un staat hat mei Projekt Forme kriet. De Turm is aus speziellem Karton, die Reenrinne, Rohre sowie es Kreiz aus Messing. Im Innere vun der Kerch han ich Bänk ufgstellt, mer gsieht de Altar un de Chor, weil es Dach kann mer runner holle – so gsieht mer in die Kerch nin“.

Iwer die Boagaroscher Kerch

Im Jahr 1773 hat die Kameralherrschaft bschloss, mit em Bau der römisch-katholisch Kerch in Bogarosch anzufange. Am 15. Oktober in sellem Jahr war schun es Fundament ausgemesst, 1774 ware die Bauarweite abschloss un am 1. November 1774 is die Kerch vum Ehrendomherren un Neu-Beschenowaer Pfarrer Georg Johann Franz Gliubichich feierlich ingeweiht gin. Es Altarbild zeicht Maria Himmelfahrt. Am 30. September 1859 sin die zwaa Seitefliegel un de kreizförmiche Ausbau der Kerch vorghol gin.

Die Orgel in der Bogaroscher Kerch is 1816 vun Franz Wälter aus Temeschwar erbaut gin un soll laut Kerchebiecher es erschti Inschtrument mit sechs Register sin. Sie is phaarmol repariert gin: 1837 vun Paul Galy, 1898 vun Leopold Wegenstein, 1958 vun Franz Kecses un 1973 hat Walter Kindl die Originalpheife gereinicht, gstimmt un de Blossbalch mit eem elektrische Gebläse ersetzt.